

**OSMI SASTANAK STRANA
OKVIRNOG SPORAZUMA
O SLIVU RIJEKE SAVE
Sarajevo (Bosna i Hercegovina), 24. oktobra 2019.**

NACRT DEKLARACIJE

**OSMI SASTANAK STRANA
OKVIRNOG SPORAZUMA O SLIVU RIJEKE SAVE
Sarajevo (Bosna i Hercegovina), 24. oktobra 2019.**

DEKLARACIJA

MI, STRANE OKVIRNOG SPORAZUMA O SLIVU RIJEKE SAVE, okupivši se u Sarajevu 24. oktobra 2019., na svom osmom sastanku, *podsjjećamo* na presudnu važnost regionalne saradnje i koordinacije Strana,

Svjesni velikog značaja sliva rijeke Save, njegovog okoliša i prirodnih resursa za privredno i socijalno blagostanje, kao i presudne važnosti regionalne saradnje i koordinacije u skladu s Okvirnim sporazumom o slivu rijeke Save (u daljem tekstu: Okvirni sporazum) kako bi se postigao održivi razvoj u slivu rijeke Save,

Prepoznajući rezultate od kojih Strane mogu imati koristi, kao i štetu koju je moguće izbjeći ili ublažiti putem saradnje Strana kroz Međunarodnu komisiju za sliv rijeke Save i u sklopu te komisije (u daljem tekstu: Savske komisije),

Potvrđujući svoje političko opredjeljenje za saradnjom na temelju i u skladu sa zakonodavstvom Evropske unije u području voda i prevoza unutrašnjim plovnim putevima, relevantnim za ostvarenje ciljeva Okvirnog sporazuma i njegovih protokola,

Imajući u vidu opredjeljenje Strana izraženo u "Deklaraciji sa sedmog sastanka Strana" održanog u Bledu (Slovenija) 7. juna 2018. godine, izjavljujemo sljedeće:

U vezi sa saradnjom u slivu rijeke Save

- *Cijenimo* napore Strana, Savske komisije, njenog Sekretarijata i stručnih tijela u provođenju Okvirnog sporazuma te *prepoznajemo* značajan sveukupni napredak u ostvarenju zajednički dogovorenih ciljeva utvrđenih Okvirnim sporazumom i njegovim protokolima ostvaren tokom izvještajnog perioda,
- *Razmotrivši* sedme nacionalne izvještaje o provođenju Okvirnog sporazuma i rad Savske komisije, *prihvatamo* "Izvještaj o provođenju Okvirnog sporazuma o slivu rijeke Save za period od 1. aprila 2018. do 30. juna 2019.",

U vezi sa značajnim napretkom ostvarenim u integralnom upravljanju vodama

- *Odobravamo* "Plan upravljanja rizikom od poplava za sliv rijeke Save" (Sava FRM plan) priložen u Dodatku I ovoj "Deklaraciji", kao prekretnicu u saradnji Strana koja vodi ostvarenju jednog od ključnih ciljeva Okvirnog sporazuma – *sprečavanju ili ograničavanju opasnosti te smanjenju i uklanjanju štetnih posljedica nastalih uslijed poplava*,
- *Cijeneći* aktivno učestvovanje i doprinos njegovom razvoju te *pozdravljamo* odobrenje Sava FRM plana od strane Crne Gore,
- *Obavezujemo se* na dalje ulaganje napora u provođenju Pregleda mjera koji predstavlja sastavni dio Sava FRM plana, kako bi se pružio doprinos ostvarenju zajedničkih ciljeva – *izbjegavanju novih rizika od poplava, smanjenju postojećih rizika od poplava tokom i nakon poplava, jačanju otpornosti, podizanju svijesti o rizicima od poplava i provođenju načela*

solidarnosti, imajući u vidu postojeće razlike između Strana – onih koje su države članice Unije i onih koje to nisu,

- Iako mjere predstavljaju odgovornost Strana, *zadužujemo* Savsku komisiju da Stranama pruži svu potrebnu pomoć u kontaktima s relevantnim međunarodnim institucijama, kako bi se našlo više mogućnosti i mehanizama za finansiranje provođenja mjera na nivou sliva,
- *Imajući u vidu* nedostatak pojedinih podataka i nepouzdanosti u Sava FRM planu, *obavezujemo se* uložiti dodatne napore kako bi se osigurali prikladni resursi za nastavak aktivnosti uz koordinaciju Savske komisije u idućem ciklusu planiranja upravljanja rizikom od poplava, počevši s ažuriranjem zajedničke Preliminarne procjene rizika od poplava u slivu rijeke Save,
- *Potičemo* Savsku komisiju da nastavi dijalog s relevantnim zainteresiranim stranama iz sektora upravljanja vanrednim situacijama, uspostavljen u sklopu pripreme Sava FRM plana, kao i da taj dijalog dodatno ojača,
- *Pozdravljamo* uspostavu "Sistema za prognozu i upozorenje na pojavu poplava u slivu rijeke Save" (Sava FFWS-a) kao zrele i pouzdane platforme za operativno hidrološko prognoziranje i na nacionalnom i na međunarodnom nivou u slivu rijeke Save te *cijenimo* značajno dostignuće Savske komisije, kao i svih ustanova i pojedinaca koji su učestvovali u procesu uspostave Sistema,
- *Pozdravljamo* potpisivanje "Memoranduma o razumijevanju o saradnji u redovnom funkcioniranju i održavanju Sistema za prognozu i upozorenje na pojavu poplava u slivu rijeke Save" kao osnove za održivo funkcioniranje Sava FFWS-a te *podržavamo* napore Strana i Savske komisije usmjerene na osiguranje adekvatnih ljudskih i finansijskih resursa za dalji razvoj Sava FFWS-a,
- *Prepoznajući* značajan napredak ostvaren u pripremi drugog Plana upravljanja slivom rijeke Save, *potvrđujemo* snažnu predanost osiguranju adekvatnih ljudskih i finansijskih resursa za dalji razvoj Plana te *zadužujemo* Savsku komisiju da nastavi sa naporima na osiguranju sredstava za finansiranje te aktivnosti,
- *Ističući* važnost održivog razvoja u slivu, *potičemo* Savsku komisiju da nastavi već uspostavljen dijalog s relevantnim zainteresiranim stranama u području plovidbe, hidroenergetike, poljoprivrede, očuvanja prirode i u drugim relevantnim područjima, u cilju dalje integracije privrednih, društvenih i okolišnih aspekata u planiranje upravljanja riječnim slivom,
- *Potvrđujemo* svoju predanost provođenju *završnog usklađivanja* Protokola o vanrednim situacijama uz Okvirni sporazum, uzimajući u obzir njegovu važnost za provođenje Okvirnog sporazuma.

U vezi s obnovom i razvojem plovidbe

- *Potvrđujemo* svoju predanost obnovi i razvoju plovidbe na rijeci Savi i njenim plovnim pritokama, svjesni značaja plovidbe za dalji privredni i društveni razvoj regije, *uz uvažavanje* važećeg zakonodavstva u području zaštite okoliša, kao i Zajedničke izjave o vodećim načelima za razvoj unutrašnje plovidbe i zaštite okoliša u slivu rijeke Dunav (Zajedničke izjave),

- *Naglašavamo* potrebu za hitnim deminiranjem obala rijeke Save, uz poseban naglasak na planirane lokacije radova na obnovi i održavanju plovnog puta, imajući u vidu da deminiranje tih lokacija predstavlja preduvjet za provođenje neophodnih ispitivanja u svrhu pripreme projektne dokumentacije te da moguća kašnjenja aktivnosti deminiranja mogu izuzetno negativno djelovati na već započete aktivnosti obnove plovnog puta,
- *Pozdravljamo* napredak u obnovi plovnog puta na kritičnim sektorima u Republici Srbiji, uključujući pripreme aktivnosti na obnovi sektora ušća rijeke Drine,
- *Pozdravljamo* početak pripreme neophodne dokumentacije za obnovu sektora plovnog puta Novi Grad te u skladu s tim *izražavamo zadovoljstvo* zbog uspostave Foruma zainteresiranih strana u okviru te aktivnosti kao značajnog iskoraka u provođenju Zajedničke izjave,
- Iako planirane mjere za obnovu i razvoj plovidbe na rijeci Savi predstavljaju odgovornost Strana, *zadužujemo* Savsku komisiju da Stranama nastavi pružati pomoć u kontaktima s relevantnim međunarodnim institucijama kako bi se našlo više mogućnosti i mehanizama za podršku i finansiranje aktivnosti u vezi s obnovom i razvojem plovidbe na rijeci Savi te praćenjem i koordinacijom njihovog provođenja,
- *Podržavamo* korištenje usklađenih obrazaca granične kontrole za plovila u slivu rijeke Save, s ciljem pojednostavljivanja, usklađivanja i digitalizacije administrativnih procesa u plovidbi rijekom Savom kroz primjenu usklađenih izvještaja o uplovljavanju i isplovljavanju, popisa posade te popisa putnika,

Svjesni važnosti međusektorskih pitanja u slivu rijeke Save

- *Potičemo* Savsku komisiju i Strane da preduzimaju dalje aktivnosti u vezi s prilagođavanjem na klimatske promjene u slivu, prepoznajući vjerovatne posljedice klimatskih promjena na vodni režim u slivu rijeke Save te potrebu za djelotvornim mjerama prilagođavanja,
- *Pozdravljamo* razvoj i isporuku hidrološkog modela za sliv rijeke Save i hidrauličkog modela za rijeku Savu Stranama i *obavezujemo* se da preduzmemo neophodne aktivnosti u svrhu daljeg poboljšanja tih modela kako bi se povećala njihova korisnost za različite svrhe zajedničkih aktivnosti,
- *Izražavamo zadovoljstvo* izuzetnim napretkom ostvarenim u vezi s razmjenom podataka i informacija u slivu, *obavezujemo se* preduzeti sve aktivnosti neophodne za osiguranje odgovarajućeg funkcioniranja i održavanja Sava GIS-a i Sava HIS-a te *snažno podržavamo* dalje nadogradnje tih sistema, uključujući integraciju aplikacija u vezi s plovidbom,
- *Cijenimo* rad Savske komisije ostvaren kao rezultat usvajanja "Zajedničkog akcionog plana za sliv rijeke Save" kao koordiniranog programa višenamjenskih i integriranih intervencija kako bi se ojačalo sveukupno planiranje upravljanja riječnim slivom, poboljšala plovidba, poboljšalo upravljanje rizicima od poplava, razvijao održivi turizam, štitio okoliš i provodila prilagođavanja klimatskim promjenama i podržavamo dalje aktivnosti u vezi s tim,
- *Pozdravljamo* napore Savske komisije u razvijanju održivog turizma u slivu rijeke Save kao značajnog alata za promociju privrednih koristi i *snažno podržavamo* dalje aktivnosti u vezi s tim,
- *Pozdravljamo* poruke 8. sastanka Parlamenta mladih sliva rijeke Save prenesene ovom sastanku. U vezi s tim, *izražavamo zadovoljstvo* zbog daljeg uključivanja mladih generacija kroz partnerstvo sa školama na nacionalnom i prekograničnom nivou, kako je to predloženo

na Međunarodnoj konferenciji učitelja "Živjeti s vodom" održanoj uz 8. sastanak Parlamenta mladih,

U završnim opaskama

- *Izražavamo* zahvalnost donatorima, relevantnim partnerskim organizacijama i svim drugim subjektima na pomoći radu Savske komisije i *nadamo* se njihovoj podršci i saradnji u budućim aktivnostima Savske komisije,
- *Izražavamo* zahvalnost zainteresiranim stranama na njihovoj saradnji u aktivnostima na nivou sliva te *pozdravljamo* njihovo dalje uključivanje u buduće relevantne procese,
- *Izražavamo* zahvalnost Vijeću ministara Bosne i Hercegovine za domaćinstvo osmog sastanka Strana i *najavljujemo* sljedeći sastanak Strana koji će se održati u Hrvatskoj 2021. godine.